


Durante tratamiento di e caso

R. Danies ta bisa Hues cu ta Procurador General a bis'e pa haci e accionnan cu el a haci



ORANJESTAD (AAN): Diabierna mainta Corte den Promer Instancia a trata e caso penal cu Ministerio Publico a cuminsa contra R. Danies (D.). Ta un serie di acusacionnan tin contra D. Durante interrogacion di Hues pakico D. tabata haci e delito, D. a bisa Hues cu tin un problema y cu Hues mester papia cu Procurador General (PG), kende ta esun segun D. a bis'e cu e mester tuma accionnan.

Diferente biaha Hues a haci preguntanan y

cada vez D. tabata bisa Hues pa papia cu PG. Hues a muestra tambe cu segun psiquiatra, D. ta sufrí problema mental y no ta completo responsabel pa su actonan. D. no a gusta esaki y a bisa Hues cu ta e psiquiatra no

ta bon. Den e articulo aki DIARIO ta publica e tratamiento di e caso y den un otro articulo e punto di bista di Fiscal. Asina lectornan tin un bista mihor di e caso.

VIOLA LEY DI TOQUE DE QUEDA

Den sala di Corte tabata presente e mama di D. y e omo di D. mientras cu tambe tabata presente abogado di VNO cu a bay haci demanda di daño con-

tra D. Tratamiento di e caso tabata via video conference. Hues a cuminsa cu un serie di casonan di violacion di toque de queda cu D. a haci. Hues a puntra D. pakico. D. a reacciona cu pakico e chollernan si ta cana rond y no ta haci nada contra nan. E ley ta conta pa tur. Pakico un adicto si por ta riba caya y e no. Segun D., tur hende ta mesun cos y mester castiga tur hende. El a remarca cu ora di vota si, ta bay busca adicto te den choller house pa e vota.

SPIUT LUGARNAN

Hues a muestra cu D. a spuit muraya di un banco, toilette publico, VNO, Aruba Sostenemi, warda di Polis Noord y Santa Cruz, "Aruba Pro Pedofil". Segun D. el a wordo castiga caba pa esakinan. El a bisa cu cada biaha el a keda sinta 10 dia. Hues a remarca cu ainda no a sosode un caso penal y pesey ainda e casonan no ta cla. Hues a puntra D. pakico el a spuit. D. a bisa cu el a spuit y husticia sa tambe. Hues a muestra cu D. a declara na Polis cu e motibo cu el a spuit ta relaciona cu e caso pedofil di su yiu na cu husticia no kier a traha. Despues cu e sospechoso a bin Corte y e no ta di acuerdo cu e sentencia, el a keda spuit. Segun D., e lo sigui spuit y ningun hende por stop e. El a bisa cu e no ta confia husticia.

LANTA CONTRA POLIS

Hues a muestra cu un otro acusacion ta cu D. a resisti contra su detencion 27 Juli 2020. A ofende un agente di Polis ora a bay kita spandoek patras di Kabinet di Gobernador. Esaki pasobra D. a pone spandoek sin tin permiso pa esey. Segun D., tin un problema y di con no ta drecha e problema. El a admiti di a pone spandoek. E agente muher a bisa cu D. a bay para hopi cerca di dje y apesar di a bisa D. bay patras, e no a haci. Ta asina cu segun e relato, D. lo a papia cos for di sla cu e agente femenino y door di esey e agente a push'e y e otro agentenan di Polis a bay detene y el a resisti. Segun D., e no a resisti. El a bisa cu tin video caminda por mira bon cla cu ningun momento cos a sosode asina. Segun D., ningun rato

el a bisa e agente femenino algo. Hues a bisa cu tin raport traha pa e agentenan di Polis cu si ta bisa cu D. a papia cos for sla cu e agente di Polis femenino.

INSULTA AGENTE DI POLIS

Hues a muestra cu D. lo a menaza un agente di Polis 3 Juli 2020 durante cu e tabata traha. D. a bisa Hues cu esey no ta berdad y cu tin video cu ta mira bon cla cu ta yama e agente pa m... pero no a bisa nada mas. E dia ey lo tabatin manifestacion organiza pa D. A cay sinta dilanti Parlamento un grupo di 15 meymey. Nan tabata sinta meymey caminda y tabata bebe. D. lo a laga sa via media cu lo no move. Polis a habri caminda y a bisa nan pa bay pero D. no kier. A pidi D. pa su mannan pa detene pero D. a buk pa no wordo deteni. E agentenan e ora ey a bay detene. E agente mes a skirbi raport y otro agentenan tambe a muestra cu ta manera e agente a bisa e cos a sosode. Segun D. nan ta gaña y tin video caminda por mira bon cla kico a sosode.

MENAZA MAMA Y OMO

Hues a sigui bisa cu tanto mama di D. como e omo, a haci denuncia di menaza door di D. 11 Juli 2019, e mama a bisa Polis cu 9 Juli 2019 a yama Polis pasobra D. tabatin su amiga den cas y e mama no ta di acuerdo. E momento ey D. a bisa cu e lo pone un pa un drumi. D. a reacciona cu nan ta haci druk pasobra e wela a bisa cu D., promer cu e wela a fayece, cu D. ta doño di e cas. Hues a remarca cu e asunto di herencia no ta al caso awor den Corte. El a muestra cu dia 6 December 2019 tambe e mama a haci denuncia cu atrobe D. a bolbe menaza cu lo pone un pa un drumi. Dia 25 September 2020 atrobe lo tabatin menaza. E omo lo a haya yamada di su yiu for di Hulanda cu a bisa cu el a papia cu D. y D. a bis'e cu e lo bay pone su mama y su omo drumi. Den Corte, D. ta para riba cu e no a menaza ningun hende y cu el a haya orden di su wela pa no menaza ningun hende.

LANTA HENDE

Hues a muestra cu tabatin un candela na un edificio

banda di Parlamento ora cu D. a tene manifestacion. E acusacion ta cu D. lo a lanta hende via media y a bisa cu un djs lo tin un otro candela. Hues a muestra cu D. via Facebook a bisa pa cende candela y pone Brandweer traha. D. a bisa Hues cu tin problema serio. Segun D., el a papia cu PG, kende lo a bis'e pa bay instiga pa haya su kier. Hues a remarca cu loke D. ta bisa cu PG na 2016 a duna orden pa bay instiga esey ta un acusacion hopi serio. D. a bisa Hues pa papia cu e PG y lo haya sa. Hues a remarca cu e PG no ta na Aruba mas y pesey e kier sa di D. D. a bisa Hues cu e ora ey Hues haci loke e tin cu haci y cu e no kier papia mas. Hues a bisa cu D. tin un carchi di castigo cu hopi caso habri. Na 2017 el a wordo condena pa menaza.

PROBLEMA MENTAL

Hues a muestra cu tin un raport di psiquiatra di December 2020, cu ta muestra cu D. ta sufrí di problemanan mental. Segun e psiquiatra, door di uso di marihuana pa hopi tempo, D. tin efecto psicótico. Psiquiatra ta haya D. menos responsabel di loke el a haci y cu e chens di ripiti ta hopi halto. Hues a muestra tambe cu segun e raport di Reclassering, e chens ta basta grandi cu D. lo bolbe ripiti e hechonan aki. Tambe D. a bisa cu e no kier guia di Reclassering.

Fiscal a puntra D. riba esaki y D. a bisa cu ta nan cabez no ta bon. D. a bisa cu e psiquiatra mester a bis'e den su cara esey y no skirbi coy kens. El a bisa cu psiquiatra su cabez no ta bon. Fiscal a bisa tambe cu e persona cu tabata presente na combersacion cu PG a bisa cu no ta asina loke D. a bisa. D. a bisa cu e persona ey ta gaña.

DEMANDA

E abogado di VNO (Estado Hulandes) a haci demanda di daño di casi 6 mil florin. Ademas el a bisa cu tin gastonan huridico cu ta algo mas di 1 mil florin. Ta calcula en total e demanda di daño ta casi 7 mil florin. Hues a puntra D. su opinion riba esaki. Segun D. e kier pa e PG bisa si e tin cu paga.

Hues a sera tratamento di e caso y 26 Maart 2021 lo tin sentencia.